

福建叢書 第二輯

福建省文史研究館編

明·福清
葉向高撰

蒼霞草全集

(二)

福建叢書 第一輯之二

福建省文史研究館編

明·福清
葉向高撰

蒼霞草全集
(二)

江蘇廣陵古籍刻印社

蒼霞草卷之六目錄

右編叙

董職方備兵衡永序

送膳部汝川劉大夫守鞏昌序

六家詩名物疏序

右司馬理軒臧先生六年奏績序

目峰趙先生文橐序

畱臺疏橐序

送京營張遊擊叅戎海上序

應天府鄉試錄後序

畢封君偕配孫孺人六十雙壽序

李將軍五十序

順天武舉錄後序

陳母林太夫人八十序

少司馬幼溪陳公七十壽序

儀制大夫斗崙汪君擢守真定序

竹軒姑夫雙壽序

黃離草序

中丞李公撫淮疏草序

沙令楊龍浦臺薦序

肖林沈公七十一壽序

奉別太宰曾見臺先生兼賀誕辰序

督撫奏議序

大司馬少泉郝先生七十壽序

卷之六

目錄

一

蒼霞草卷之六

福清葉向高進卿甫著

右編叙

荆川先生之爲右編也其卷四十其世自周至元其目自治道至六曹無所不該然方周之盛四十亂之徒謨謀闕如所傳者多在于晚周元夷虜也取二三策而已惟漢唐宋之際詳焉吾讀其所編次自治道而下卽次以君相次宮闈次儲嗣次公主外戚次宦官佞幸奸邪朋黨而亂繼之蓋先生之用意深而寓指微非徒分門別類便于尋覽

已也編成久未行吾友大司成南昌劉公少司成
吳興朱公相與節縮太學經費得若干緡授之梓
劉公復補其未備而朱公校焉問叙于余叙曰右
編者右史記言也言之途多而大較有三曰論事
曰論人曰規諫論事之言控揣情形料量事變失
毫芒而差尋丈非明智卓識之士不能爲也論人
之言辨別黑白指陳媿慝搜城社挾神叢非謹正
嫉邪之士不能爲也規諫之言犯顏苦口嬰鱗觸
威徃徃自敵而下受之有所不堪非勁節骨鯁之
士不能爲也上下二三十年間公車之牘至不勝

載然言之而傳傳之而收于茲編者僅僅如許顧
不難哉乃其言復有睽有合有遇有不遇挈而程
之論事之言十僅得四五論人之言十僅得三四
諫爭之言十僅得一二何以故其說愈逆則其勢
愈拂也夫忠諫之士代已不數人人又不數言言
又不數用然則忠言嘉謀之售于世者乃千百中
之僅見耳言之難聽言尤難亦何惟乎治日少而
亂日多哉我明 文皇帝嘗命儒臣輯歷代名臣
奏議因諭之曰致治之道千古一揆君能納善言
臣能盡言不隱天下未有不治大哉王言治亂興

衰之故盡于是矣惟是奏議一書卷帙浩繁尋究未易學士大夫鮮窺其全茲編網羅既廣澄汰復精微事則得失具有辨人則忠佞如見至于上關主德下切臣忠甲乙雖黃尤深致意蓋微獨皂囊封事當奉爲準繩卽以備黼座之箴規勒千秋之鑑戒無所不可說者以其體雖主于記言而其義實兼乎記事殆不虛也今堂廉日隔造膝稀聞所藉以效忠抒誠匡維補救惟章疏一事而奏牘滋煩并格滋甚上下之間其難或有過於前代者明主可與忠言盡臣所宜畢慮劉朱二先生之倦

倦而刻茲編也得無意乎余故因命叙而及之雖然吾有感于先生之自叙也宇宙棋局也奏議譜也今旁觀者見有善着而苦于當局之易迷當局者見有成着而苦于旁觀之掣肘旁觀與當局相持而局之成敗不暇問矣此亦古今之通患也夫唐先生蓋精于譜者而用尚未究今二先生皆國手行究其用矣其能善用譜也能毋與旁觀者兩相苦也余不佞請以茲編爲息壤焉

新編

文庫

三

董職方備兵衡永序

國家吏治綜自郡邑而監以按察使者其職於察吏詰姦平賦斷獄諸疆場之務無所不舉而其重在治兵其居是官內則臺諫郎曹外則郡守皆可積資而待遷顧自內往者於郡國之事多有所不習外者習矣而封域之異勢民俗之異宜阨塞要害之異地非甚練而周於務者不能得其竅會故監司之職日以隳而兵政日以廢奸益萌生毋惑也宇內皆然而楚爲要楚地廣袤甲於他區崇山大澤侵雲稽天盜賊姦宄羣逞而橫發緩則利楚

以爲府急則匿楚以爲藪環楚之封疆分部者八
乃零陵衡陽直其西南以綰轂百粵而襟帶全荆
最重地也合二要郡而監以一使者得其人爲難
歷下董公擢自職方郎以往職方氏在周官則大
司馬之屬 明興雖建官準周而其名稱多所更
定獨職方無改焉六典所載主九畿之藉辨其人
民財用九穀六畜之數周知其要害使同貫利
明仍其業而益以練士覈戍選舉推擇諸法蓋大
司馬之政職方舉其十九故爲職方者其於郡國
之事封域民俗阨塞要害宜無所不習其出而治

兵則故業也董公爲職方雖未久然久於其曹前後大司馬推曹郎賢無不先公公爲中州李官有聲其在曹復留心四方之故於吏治兵政尤所練習年來方隅多事東西受兵徐淮之間受水充豫閩越頻仍受祲楚稍寧矣世所急楚者謂何母亦以他所患苦皆可循形測委猶爲易辨而楚之虞或虞在稍寧而瑕釁潛伏卒發而莫禦也公平居而按職方之籍蓋必有蚤計焉方周之盛幅員盡於江漢筭路籃縷之所啓猶裔壤也然而職方叙列九州首揚次荆中原諸州莫之先焉丹銀齒革

之利荆獨擅之真用武之國矣表其鎮則衡山夫
非公之部歟曰者主爵請委公以盧龍 上竟留
公而置公於楚固謂盧龍近輦轂下緩急可旦夕
信衡永介在楚粵非才且習如職方大夫不可公
往矣浮江漢而臨衡湘其封疆政俗施爲所宜先
後與向所按職方圖心畫而早計者宜必有合於
以部署兩郡舉監司之職直緒餘耳公在楚而楚
重楚重而南服晏如則 天子之善用公也其猶
有周官之意歟公先是有南宮之役比行而所舉
士曹君輩乞余言爲贈余故未習公然雅向慕之

而曹君又余戚不敢辭顧余豎儒耳不習兵閭於
爲吏其奚能有言第聞公喜文學所舉皆知名士
蓋齊魯天性然也夫楚自倚相靈均以來彬彬多
才今益烈矣公折衝籌策之暇得毋取其餘而潤
色之哉